

四庫全書

集部

欽定四庫全書

集部

北海集卷一至三

詳校官石中允臣薩敏

主事臣呂雲棟覆勘

謄錄監生臣程廷璋

謄錄監生臣嚴續曾

欽定四庫全書

集部四

北海集

別集類三
宋

提要

臣等謹案北海集四十六卷宋綦崇禮撰崇禮字叔厚高密人後徙濰之北海登重和元年上舍第高宗南渡為起居郎召試政事堂拜中書舍人歷官寶文閣學士知紹興府退居台州卒贈左朝議大夫事蹟具

宋史本傳藝文志書錄解題俱載崇禮北海集六十卷世久失傳厲鶚宋詩紀事僅從天台勝記中得所作石梁瀑布詩一首而其他概未之見今檢永樂大典載崇禮詩文頗多中惟制誥最富表啟之類次之散體古文較少而詩什尤寥寥無幾蓋其平生以駢體擅長故也集中間有原註稱崇禮為先祖則當時所據猶其家刻之舊本矣史稱崇禮妙齡

秀發聰明絕人羣心辭章極潤色論思之選
再入翰林凡五年所撰詔命數百篇文簡意
明不私美不寄怨深得代言之體今觀是集
所載內外諸制大約明白曉暢切中事情頗
與浮谿體格相近如呂頤浩開督府制詞則
樓鑰賞其宏偉王仲巖落職制詞則王應麟
取其精切鄒浩追復待制制詞則宋史採入
本傳以為能推朝廷所以褒恤遺直之意其

草秦檜罷政制則直著其惡致檜再相後秦
索其藁幾蹈危禍史所云云蓋非溢美矣陸
游老學庵筆記稱崇禮謝宮祠表云雜宮錦
于漁簑敢忘君賜話玉堂于茅舍更覺身榮
時歎其工又有一表云欲挂衣冠尚低回于
末路未先犬馬儻邂逅于初心尤佳云云今
集中乃無此二聯知其傑製鴻篇尚多遺脫
然據今所得觀者已足見詞藻之精麗不必

全璧也謹分體排訂釐為三十六卷又兵籌類要一書乃其在翰苑時所撰進皆援据兵法參以史事各加論斷雖紙上空談未必遽切實用而採摭尚為博洽今亦編為十卷次之于後其厯官除授告詞及呂頤浩書啟李邴祭文秦檜乞追取御筆詞頭劄子原本皆載入集中今並仍其舊而益以宋史本傳氏族言行錄諸條別為附錄三卷系諸集末以

備考核焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

北海集卷一

宋 蔡崇禮 撰

古體詩

次韻德升尚書求慶閣後觀梅之作

託根層石下，閃艷重檐陰。
愛日少回照，淑氣潛相尋。
入牖暗香上，俯欄重蕊深。
孤絕多態繁，穠徒滿林。
怪君獨吟賞，却酒不為斟。
應曾共花約，遂擬合朋簪。
雪意殊未已，寒英虞見侵。
聞花正芬馥，相向一披襟。

次韻國佐侍郎即事

雪霽春未和寒雲慘多陰同鄉有期約學海慵沿尋吾
衰今得友晚交契則深歲寒見松栢茂悅依同林倚市
人所賤在山泉可斟蟠枕着實遲勸我簡蒿簪吟窻擁
翠娥分定那得侵愧笑領君意取酒問胸襟

次韻國佐二詩

羈旅念鄉縣衰遲驚歲陰交朋慰幽獨詩酒相追尋求
盟敵難弭助順天意深邊書息障候喜氣到山林聯裾

得良會舉白毋緩斟話舊諠笑語拚醉歌冠簪梁塵歌
響墮玉頰酒紅侵殷勤捧杯意不惜污羅襟

官閑一何幸安坐閱光陰世事來無端循環那可尋名
高毀易至官達憂常深豈敢慕華屋且願依中林主人
真好客置酒每共斟里仁知有托計決擬投簪樂飲不
忝至歸夜從深侵梅英苦留戀著人香滿襟

再賦一首趣韻信筆初無定意也

妍詞少勁氣直表無曲陰勸百豈救一枉尺焉取尋世

路務爭險人情難測深漁樵各有侶英俊自成林藥苦
病所利酒多狂莫斟珠投防按劍玉折戒磨簪願持松
栢操甘受雪霰侵途窮但回步何用涕沾襟

再次前韻

笙簧樂富貴等是老墻陰汲汲不知止悠悠何處尋所
嗟天賦薄未報國恩深一夢遊帝闕九年辭禁林官廩
尚可飽村醪時自斟不嫌泥土足懶拂塵埃簪窮巷春
雪霽寒檐朝日侵意行何所適還欲訪同襟

德升尚書出示歲除用韋蘇州韻前後二篇及
兩郎屬和粲然盈軸賞歎之餘有感於中亦輒
次韻書山居一時事

寒宵送徂歲青燈照華髮天時自代謝人事更治忽
朝今中興正朔幾書月未作故鄉歸又見新花發稚女
巧娛予剪綵粧風物一醅婪尾觴頽然百憂歇

兒童喜時節老大悲齒髮流光難把玩百年如倏忽夜
燈猶故歲晨燎已端月回首名宦途常虞駭機發今來

對青山安坐見春物得失孰多少且使寸心歇

奉紀

八座近黃扉三公宜黑髮用舍豈自謀機緘何翕忽一
麾遽出守雙溪厭風月江海今就閑議論猶英發大厦
終須材虛舟聊應物勝覽莫辭頻君騶寧久歇

自述

箕裘紹弓冶不絕僅如髮遇主當艱虞持身敢怠忽謬
隨供奉班更直淹歲月出領東諸侯羽書憂調發丘壑

從素心朝廷憐舊物桑榆不自收我駕將焉歇

和東園黃香梅之作因復勸遊

寒梅殘幾枝
揷花無點髮
僧房不得地
飄零人所忽
谿風晚來急
尋香堆碎月
不料東城春
嬌黃方秀發
新詩寓佳賞
留情寧一物
芳卉滿春山
籃輿來莫歇

和李元叔秋懷

移居寄城郭
閒如在郊坳
百卉暮凋翠
兩山常對青
兒童漸吳語
氣俗易薰蒸
喜聞淮師捷
神武暢威稜
叛寇

不足滅四夷其來庭十年亂離厄永夜鄉闕情庶見丘
墓邦敢貪簪紱榮故人致尺素笑烹雙鯉頰清切哦十
詠飄零乖一觥歲晚良可會濟世須時英

杜門身塊坐息念心灰死香火遠祠庭文書淨牕几治
劇力豈任投閑計良是深慚未報恩尚費官倉米吾儕
晚聞道錯以名為市那知標榜著便有謗尤起如君取
已多蚤合登貴仕况彼青箱業家聲在人耳草草脫鷹
冠重升未應止但願毋近名嘉言終合指

送澠州詹倅五首

矯矯摩天姿青雲久垂翅別乘屈王祥海隅賴康濟峻
節回郡政深仁賑民匱胡不三年留斯民且安慰

天子有使指借問何官曹轉粟泝洛津帆檣連萬艘大
臣進所知得此千人豪扶搖一借便看上青雲高

東風催去旆南浦傷離情攀轅何紛紛曉日來傾城中
有韋布士雪涕揮縱橫欲識何為者為言門下生

先達收人材輕重在題目我出一何幸青眼深回矚聲

名士所貴推挽亦已足母老憐我貧家事猶省錄
人生樂知己見遇况國士吾身不激昂孰為報恩子薦
達有往來登門願誰始寄謝魏王孫丹心亦如此

蒙成大亨分送紫蘇且以前書有戲謔語垂示
解嘲輒次元韻

先生昔為吏敏政便劇繁利必無錯節大邑如烹鮮民
曹與廷尉衆紛常裕然胡為棄九卿歲晚來灌園分陰
在所惜寸地不忍閑草木苟有用豈憚遠移根從來憂

世心中懷百慮煎栽梅期鼎實無取寒花妍植竹待威
鳳肯羨冥鴻騫此志未云遂亦足留風烟山泉釀賢聖
艷曲聽嬋娟引酌梅竹下醉卧雲峯前何以解其醒玉
笋捧甌圓香泛紫蘇飲醒心清可憐洗滌麴蘖昏還觀
神明全先生得此物手種當春天耘培供採掇內熟常
得痊云何失滋茂無乃人力愆因疑課督功多稼移大
田循例猶見分乞隣問東阡不耐作戲語解嘲來巨篇
珠玉隱光彩入城驚市屋風霜已落木洞户宜垂氈何

當擁爐夜一樽同笑言

次韻成季尚書喜雪

衰年憂患百侵凌
胃次聊憑詩溲雪
寄情山水時自娛
不求賞音絃莫絕
身顯豈忘莊舄吟
量能盍止周師任
閑中之趣難具陳
赤城慵卧七回春
終南捷徑猶可疑
海濱老矣誰見稱
積雪加寒固應爾
且為北人湯餅喜
用晦顯謨近出長
篇德升尚書遂已
賡和輒牽鄙思以
繼二公之後
兼簡行之待制

赤城自昔佳山水遊宦何曾論道里
竭來五載著閑身
天假衰年幸如此偶逢人面即成親
信美那知非我里
相從晚得世家賢風流未泯典刑全
豫章杞梓雜蘭玉
向來人物常推先一門卿相有三四
功名並列青瑤鏤
憔悴祇令餘此老北闕薦書誰復草
忘懷驟喜肝膽傾
學道故宜容鬢好江湖歷走到海濱
可怕鯨波風浩浩
平時所寶非瓊瑰生涯都付餅與壘
客至輒留盡歡適
玉山不覺歌崔嵬醒來默坐忝佛祖
餘醒宿障隨驅排

衡門我亦棲遲久却視華途慚俊茂山中麋鹿會同羣
客裏妻奴得相守感君向我意甚真杯酒招邀惟恐後
往還況此足親知清談雅集每忘疲尚書舊信心如水
京兆猶傳政不私共尋泉石豈無伴却上雲霄知有基
顧我終焉奚所欲一丘一壑志願足勝遊非遠閑日多
秋節正涼新酒熟東州西縣君何求請解行包停去躅

今體詩

故李察院挽歌辭二首

學古方從仕投閑遂屏居聲華共省舊風采栢臺餘黃
壤歸何速青雲志莫舒推財均室盡遺子有家書

有才曾少試無命可深尤憲府初裁豸滄溟遽狎鷗感
年嗟未老多病忽先秋勤學平生事萱堂孰解憂

和人見寄

江海同為客山林不並居經時占喜鵲今日剖雙魚擁
鼻還成詠撐腸未廢書孤吟聊自遣誰復借吹噓

故丞相高平范公挽歌辭三首

遇主方英妙當朝獨老成
小車何耄耄前席起公卿
感會真千載哀榮止半生
傷心理玉處愁霧鎖佳城

帷幄言猶在山林迹已遷
登庸疑早貴福艾久長年
渾厚風神粹恢宏德度全
直應天奪速何物恨鳶肩

憶昔金鑿直天顏喜色新
草麻慚大手命相得良臣
內賜充懷袖廷啟聳樞紳
祗今餘典冊那復見斯人

故丞相呂成公挽歌詩辭五首

翊戴興炎祚權宜做晉都
闕中蕭相國江左管夷吾
感

會逢英主拘孿鄙腐儒人間留不得去與列星俱

憶昨初南渡人情正自危起平王室亂笑指楚囚悲投
筆來方銳乘桴計不疑還師期克敵遺恨失斯時

仗鉞除君側披荆立本朝規模收廟勝威畧動天驕賢
業留黃閣閑情在午橋傷心桃李徑霜霰日蕭條

名與功高大身為世重輕初傳都督令已懾敵人情門
謝三千客胷包十萬兵聖王分陝意歎息失長城

齷齪誠何算堂堂亦已休嗟聞閉東閣忍復過西州會

送宜千乘歸藏但一丘往來埋玉恨清淚漲溪流

危從書事

危從官班近難難報效微又同陪法駕復共著征衣舉
目江山好傷心井社非何當戎馬定却作故鄉歸負郭
田園美迎霜雉兔肥風塵嗟瀕洞夢寐悵依稀聖主興
皇祚羣公翊政機時平當自劾還採故山薇

入雁蕩山

傑峯秀嶺競崔巍緩引籃舁不用催一徑靈虛飛鳥上

四圍春色畫屏開
鹿門未有携家便
雁蕩何妨築室來
已上封章乞閑散
勿令俗駕却輕迴

德升勸酒為已懋
尚書壽予即席賦長句以代

俳諧

禁掖東西曾並直
鑿坡先後亦聯名
那知白髮歸田舍
却見朱幡蒞海城
往事回頭真是夢
流年屈指只堪驚
一盃相屬公應悉
冷煖難移故舊情

國佐侍郎併示佳篇謹復次韻

漂流歲晚憐羈跡慷慨平時仰令名問俗卜隣依里社
登瀛得友自都城諫書昔觀言常用偉論今傳衆尚驚
未足朝眠何所事良辰詩酒最關情

見德升國佐酬贈歎受不已用復次韻

常伯二卿俱擅美憲臺諫省各知名英詞宜和南薰曲
雅意難追北斗城元禮風聲誰得御孟公姓字坐皆驚
聯肩接袂予何幸一笑從容每盡情

賦東城梅花示哲上人

一枝冷落為誰開，欲遣寒香入酒杯。
鐵石心腸猶解賦，芝蘭風味合相陪。
臘前頗訝踈踈見，春盡何妨得得來。
十里東城不嫌遠，待看山月照徘徊。

題子正觀察溪風亭二首

巧據東西面，勢雄茲亭壯。觀一園中淙淙鳴，竇過流水
拂拂虛簷來。遠風好解塵纓，濯清泚聊披醉衽，望穹窿
泠然便欲乘風去。汗漫相期孰與同。

溪上微波起，縠紋涼颺不斷快。餘醺飄飄弄袖，疑輕舉。

馥馥吹花得細聞，但羨園林今地主。焉知弓劍舊將軍，
功名興盡從吾好。白首安閑少似君。

德升尚書賦溪風亭二首以題為韻。顧風字某
已先作別賦溪字一首。

泉通暗甃瀉清溪，倒影風亭翼瓦齊。借問披襟聆漱玉，
何如擲甲聽征鞞。相過底厭時揮麈，獨坐應須日杖藜。
信美那知非我里，倚欄歸路已都迷。

題天台山石橋庵院

林麓陰森徑屈盤漸驚危步入重巖地分竇剎臨空翠
天設飛梁跨激湍霧暗雲蒸山氣肅雪翻雷靦水聲寒
我來不作多求想試出神光變現看

案天台勝紀載此詩作題石梁瀑布

徑屈盤作曲盤霧暗作
霜暗變現作徧現俱誤

宿獨覺院

早發招提宿雨晴征衫猶帶夜香清山藏鳥道疑無路
石觸溪流自有聲適足此時逃世網收身何日濯塵纓
迂踈愧乏論思效尚得君王記姓名

故福國夫人挽歌詞

從夫禮法舊推稱
訓子詩書亦蚤成
烏府盡言知內助

鳳池得位見親榮

今西廳參政
本中書侍郎

隙駒不究期
頤壽風木

長悲欲養情
厚福尚餘湯沐地
并歸賢嗣作功名

蜀都旌節繼輝光
象服重來意獨傷
許國毋辭驅遠馭

懷人忍復舍中堂

先太師嘗治成都及參政再領蜀
太夫人感念時昔遂不居正寢

新

阡豈料令同穴
異縣端如在故鄉
錯顧飛雲何處是
西

山松櫨已成行

奉和德升尚書探梅之什仍用元韻

題詩曾動何郎興寄遠猶傳陸凱名
渴見寒英娛北客共尋春信向東城
蜂粘晴蘂應先破雀啁芳心已盡驚
便擬催開爭賦詠臘中獨使擅幽情

七月乙丑作記夢詩初不敢示人而私有傳去者德升尚書遽先枉和索元篇

清夢分明到玉堂紫衣催引對龍章
似令裁詔移時罷尚想揮毫半夜忙
千里力疲心已息十年境熟念難忘

此生未有酬恩日坐慙衰髯祇自傷

再用韻奉謝德升尚書見和且以解嘲

西風醒夢入秋堂夢境還空寄短章
妄見徒嗟妨睡美閑心久謝赴朝忙
流年倏忽身今老榮路斯須味已忘
慚愧君詩真戲謔邯鄲自警亦何傷

德升尚書併示新詩愈富而愈工不勝歎服
願見戲之語不置而自處太謙謹和答以重致解
嘲之意

慶弔從來不下堂漫勞善頌費雕章
自嗤夢已空花散更看詩為寐
語忙論每闕踈時所棄才稱美
秀上難忘我宜屏跡君當起
出處相違恐兩傷

重擬自賦一首呈德升尚書

旋葺幽居卜築堂歸棲不負乞閑章
飲遭田父那辭醉雨覓漁師未覺忙
汲汲功名徒競逐悠悠身世已兼忘
此心真可安江海免使莊生笑重傷

蒙示叙舊之作情眷甚厚不可虛辱輒次元韻

愧非所以為報也

八座方登政事堂一麾却佩郡侯章求閑宛轉常虞謗
治劇從容豈厭忙老去昔遊君尚記夢回陳迹我俱忘
相從且共銜杯樂世路爭名巧中傷

奉酬已懋尚書

紛紛胡騎來無定整整王師動有名已報妖氛掃秦甸
還聞聘使出龍城灼知天意民皆悅怯聽風聲寇自驚
就養東朝歸駕近和戎深見聖人情

鄉邦甲第常牽興玉几金甌久記名會秉樞機還魏闕
且栽桃李滿春城郊原氣煖花將發閭里聲和犬不驚

書昨日出城所見

勝日假時聊共樂未應歸隱狗高情

和郭傳師歲晚書事

塵掩龍韜玩具文雨昏金甲岸綸巾橫行漸復思清海
高臥端來做翠筠推轂塞垣終用舊調絲洞戶且酬春
不辭勝日來追賞却恐功名要及辰

漫成

生平雅志在林溪故里塵昏未定棲晚向瓊臺諧問舍
喜當淮塞罷鳴鞞出郊賸喜園亭勝策杖應須酒榼携
隨意一觴兼一詠醉言無次亦無題

書述今古懶不讀樽列聖賢時一中顧我本無當世志
愛君真有古人風賜環忽恐歸期促放盞常嗟樂事空
山鹿野麋便茂草鳳凰終合止梧桐

佚老堂為丞相文安公作

社稷功名不自賢小園卜築賞閒年脫遺富貴還身外

收拾芳菲寓目前未息烟塵勞矚望莫孤風月且留連
一時賦詠多竒作江漢崧高好共編

帝眷民瞻豈暫忘江山信美可終藏元勳合冠凌烟閣
雅興聊同綠野堂已作時霖却龍卧行看天討待鷹揚
囑公未用安高退准擬功成老故鄉

寄青田縣令楊仲固

九載分違幾日同銅章又過淞江東芝田吏隱常看鶴
山邑官閑早夢熊囹圄屢空知訟簡困倉相繼喜年豐

傳聞江上風塵息相國寧忘幕府功

酬李元叔察院見寄

書到山中手自披
炎涼不改似君稀
術窮五技緣何事
巢穩一枝聊可依
掃跡徑須休去好
冥心深覺向來非
緩轡清唱緘題罷
却對松牕靜掩扉

重九日宴臨漳亭

九日追歡異昔年
強隨時節到層巔
俯觀殊俗身如客
平瞰丹霄勢欲仙
故國傷心滄海外
行朝傾首碧雲邊

興闌酒罷催歸馭四面嵐光合暮烟

雪晴

水箸垂簷滴漸多眼花眩目氣初和
功成尺瑞追前賦喜兆千箱可預歌
坐看嫩黃滋柳色遙知新綠漲湖波
閉門積玉渾消盡却有兒童整雀羅

喜雪呈已懋使君兼簡德升尚書國佐侍郎

憂民太守致精祈愛物天公意不違
要及歲元彰瑞應故先春至作花飛
梅藏疎藥餘芬馥山壓羣峯失翠微

疫癘已消麩麥潤更隨晴色探芳菲

陪觀使太尉燕集長句兼簡座中諸公

遶郭江山四望中一時共寓接羣公戚藩位列三司貴

帥閩班分二府崇華省名卿踵持橐

德升國佐
皆任春官

庶車宿

將久橐弓追遊亦有鑿坡客頗賴今先鶴髮翁人事等

閑欣戚異賓筵聊喜笑言同更須結伴春遊去已過催

花幾信風

對客隱几詩

世路機兼穿人情楯與矛客能知許事兀兀一時休
邊書猶揀羽世用在持矛空言客何務問事其少休

晚晴讀書

成功收拾芥舊讀餘斷編時思賢聖對久要故依然
忘憂有妙理細與麴生論相携醉鄉去醒見月當門

山寺寓居

塵埃暗宮錦耒耜安田廬陳力知不能不肯獨何歟
宣室思前席承明虛直廬不肯入州府分其終隱歟

東齋夜坐

當官肯虞謗遇事羞摸稜
閒來愛清夜默坐對青燈
一時盛意氣四海竦風稜
我懷非此念兀坐對青燈

欽定四庫全書

北海集卷二

宋 綦崇禮 撰

制

鄒浩可特與追復龍圖閣待制制

此詞乃先祖行草具官告

假李正民舍人當直不復改作用先祖詞以已名行下

勅朕履茲艱運迹彼亂源傷謫佞之成風悼忠良之獲罪肆褒遺直用勸在官故具官某處心不欺養氣至大言期寤意引裾嘗犯於雷霆計不惜身去國再遷於嶺

徵具臣動色志士傾心英爽不忘想生氣之猶在姦諛
亦死知朽骨之尚寒其還延閣之清資少慰重泉之幽
憤噫為善之効其報也長身雖抑於生前志卒伸於地

下尚其肸蠭歆此寵光可

案崇禮因草此制得名蓋初
知制誥時筆也鄒浩亦政宣

時人故特列
於制詞之首

沈積中可特追復資政殿學士還舊官與合得

致仕恩澤制

勅會沈積中昨知真定府力陳不可取燕山所獻書具

在童貫深惡其言奏差積中所仇置獄根究文致其罪
遂至追奪九月二十六日三省樞密院同奉聖旨特追
復資政殿學士還其舊官與合得致仕遺表恩澤

勅乃者燕山之役謀之不臧貪目前尺寸之利而亡以
善其後靡敝中國啓釁夷狄卒成意外之禍嗚呼誰生
厲階至今為梗既往何及言之痛心以爾故具官某頃
使朔陲備聞初議迨今師閫實始興言乃獨抗章陳其
不可致權臣之甚惡陷獄吏之深文奄至沒身遂遭削

籍載惟前事良惻朕心矧元惡之已誅顧重辜之未洗
是用還文階之峻秩復秘殿之隆名仍推延世之恩併
眎漏泉之澤魂而不泯尚克歆承可

朝議大夫試中書舍人李公彥可轉中奉大夫
守中書舍人致仕制

勅侍從之臣朕所優遇矧上還于官政宜加厚於寵章
具官某久以藝文歷居華要藉其素望擢在近班既觀
潤色之能方矧論思之益屬往從于行省乃奔避于征

塵未即遠歸遽茲引疾念艱難之際雖切于用賢矜確
苦之辭勉從于謝事其陟文階之峻以為故里之榮尚
勤葯石之功永介壽康之福可

宣奉大夫提舉亳州明道宮朱勝非可除觀文
殿學士充江西荆湖南北路宣撫使制

勅經體贊元入則秉鈞衡之重折衝禦侮出則宣軍旅
之威維兼資文武之臣宜迭任安危之寄我圖故弼茲
煥寵章具官某敦大而剛明深沈而和裕鎮羣情之疑

畏屹如鼎鼐之安裁庶事之糾紛判若著龜之決頃惟
變故實賴彌綸馴暴虎而卒無所傷扶神器而終能返
正逮從去位旋坐黜官雖身遠於朝廷亮心存於王室
惟遺塵之未靖念國步之方艱非時舊人孰任吾事是
用寵班秘殿往總行師撫江湖三道之遙臨荆鄂上游
之鎮庶資宿望式控中原昔謝安起東山之游以蒼生
之所係而裴度委北門之寄由朔寇之未寧尚勤綏御
之方克副憂勞之託維吾元老豈煩訓辭可

明州城下與金人接戰陣亡將官党俊可贈鄂

州觀察使制

勅朕厚賞戰多優褒死事所以勸有功而哀盡節也故
具官某夙以材勇聞于軍中鄞江之役力戰以沒主帥
言狀朕甚悼之噫士固有臨敵忘生而義不反顧者身
雖隕而忠烈之名以垂不朽而激懦夫與夫畏怯逗撓
玩寇苟生之徒蓋有間矣廉車峻秩肆以追命魂而不
泯尚克欽承可

朝散大夫秘閣修撰知衢州胡唐老可除徽猷閣待制知鎮江府充浙西路安撫使制

勅西清次對之聯是為近侍京口撫綏之任實控要津
數求文武之通才庶協搢紳之公論具官某系出華胄
名聞上庠提槩懷鉛飽藝文于芸省明目張膽聳風采
於霜臺出分師帥之憂適據閩吳之會比更大盜安保
堅城恩威既著於吏民施設具存於條教載疇績用進
易藩宣升延閣之近班俾參法從付臨江之雄鎮兼制

列城庶均一郡之功并浹七州之惠國方多難將扶允
賴于折衝時已盛秋備禦正資于設險奠茲南土倚爾
長城往服訓詞佇觀成效可

韓世忠可除西路制置使應沿江防守戰守備
禦之事並聽節制依舊鎮江府駐劄制

勅控長江而作鎮既先十乘之行護諸將以臨屯茲屬
三軍之帥爰加使號用壯軍容具官某沈毅有謀驍雄
無匹臨機而出方畧弗資金版之書定亂而事干戈曷

取毛錐之用奮身邊塞宣力顏行勇蓋北方夜擣全師
之堅壘勳高南土生俘同惡之逋囚迺視秩於三孤仍
兼榮於雙節屬當備險方俾移軍列戍江津實倚長城
之重分釐淞部宜歸大將之權遂專節制之雄庶一師
徒之志臨淮號令覺士氣之增新道濟威名想敵人之
嚴憚寬予憂顧勉爾成功可

韓世忠保明苗傅劉正彥賊兵見陣賞功人第
一等武功大夫何順等可轉三官制

勅某等朕比命將臣往擒逆黨執俘折馘師既有功舍
爵策勲賞其敢後爾等躬提部曲遠即戎行各奮忠勤
用能克獲第功異等累進厥官益勵壯心尚觀來効可

起復左武大夫忠州刺史沿江措置使司前軍

統制軍馬郭吉御營累次差管押人船前去宣

化渡濟人馬並無踈虞可特與橫行上轉一官

制

勅爵賞之設功能是程苟率職而不愆顧施恩而何吝

具官某蚤由材力久事戎行方繕治於舟師會招徠於
兵衆累將渡檝往濟江津既利涉以無虞見服勤之有
績宜從進秩用以勸勞往祇對於寵章務進圖於忠
報可

奉議郎江淞制置隨軍轉運副使朱異等轉官

制

勅具官某等朕比命迺臣往平逋寇執俘振旅師既有
功拜爵策勲吾何愛賞爾等或勤饋餉或典機籌或供

其營戍之煩或濟以師徒之助或招徠其黨與或保固其墉隍各奮厥忠用成乃績第名來上進秩有差往祇錫命之榮益勵盡心之報可

翊衛大夫康州防禦使知鄭州董植右武大夫
榮州團練使權鄭州兵馬鈐轄王昭遠可各轉
一官制

勅出師以律既收克敵之功賞不踰時可後策勲之典以爾具官某等臨戎共事報國同心遇敵騎之合圍即

郡城而堅守兵威稍見虜衆自奔既屢擣於賊營因大殲其醜類載觀忠蓋良用歎嘉其升序於崇階以勸功於諸將益思奮勵圖報恩榮可

朝奉郎充集英殿修撰知婺州沈晦可除徽猷閣待制制

勅江津失守敵騎長驅當其隧者何止井湮而木刊避其鋒者誰復淵停而嶽鎮念皆有山谿之險固豈無城邑之防要在得人乃能保境具官某頃由西掖出殿方

州屬暴敵之猖狂正鄰邦之擾攘躬在守臣之責力圖
禦敵之方事不辭難克徇國家之急鋒無敢犯遂寬民
社之憂宜有寵光以為旌勸其升華於禁職俾增重於
守符尚懋爾庸嗣有褒典可

叅知政事范宗尹故曾祖德贈太子少保制

勅朕眷禮大臣蓋俯殊於庶位褒崇先世乃上及於曾
門惟流慶之有來顧疏恩之可後具官故曾祖某鞫光
布素隱跡丘園獨矜天爵之修曾靡世榮之慕考之報

施宜有吉祥生而不享於其躬沒乃克興於厥後鍾之
三世大彼一門方延置於疑丞俾叅陪於政事首舉顯
先之典用章積善之休賁嘉命於九原陟春宮之二品
尚其肸鬻知克歆承可

故曾祖母朱氏楊氏制

勅眷禮大臣蓋俯殊於衆位褒崇先世乃上及於曾門
惟衍慶之有來顧疏恩之可後具官故曾祖母某氏出
自良族嬪于吉人既無媿於平生肆有興於後裔鍾此

三世大其一門方延置於疑丞俾參陪於政事首舉顯
先之典用彰積善之休錫嘉號於小君賁新恩於幽窆
尚其肸鬻知克欽承可

故祖昌可贈太子少傅制

勅朕眷遇大臣夔絕百僚之禮顯揚先閥並推三世之
恩蓋積善之源既深肆流根之澤亦厚具官某故祖某
生有懿行沒遺令名夙傳美於當年初無缺行審貽謀
於後葉宜有顯人鍾此賢孫為吾近輔方延登之伊始

稽典故之攸存寵追祖廟之光超亞儲闈之傳英靈不
泯嘉命其承可

故祖母制

勅朕眷遇大臣賞絕百僚之禮顯揚先闕並推三世之
恩蓋積善之源既深肆流根之澤亦厚具官某故祖母
某氏生有懿行沒遺令名夙傳閨閭之風猶作鄉閭之
法蓄其餘慶鍾此聞孫方延置於巖廊首褒崇於祖廟
追賁筭珣之贈式增泉壤之光魂而有知服我嘉命可

故父昱可贈太子少師制

勅朕登用寶臣叅陪機政豈獨公朝之喜亦惟私闕之榮宜有寵章逮其考妣具官某故父某抱能未試藏器弗沽宗族稱其慈仁鄉閭推其信誼于公駟馬茲無媿於高門韋氏一經終有傳於遺子克生令器為時顯人養志何追但美流根之澤教忠有自方收報國之功欲慰孝心式嘉褒典舉密章之一命亞儲苑之三師英爽不忘追崇未艾可

故前母李氏郝氏制

勅朕登用寶臣叅陪機政豈獨公朝之喜亦惟私闕之榮宜有寵章逮其考妣具官某故前母某氏生稟淑質來嬪慶門惟婦職之無虧惜天年之不永克相夫家之祉鍾茲嗣葉之賢均被子恩何殊已出錦囊犀軸爰追賁於綵綸翟第魚軒用增光於泉壤尚其冥漠知克歆承可

故母李氏制

勅朕登用寶臣叅陪機政豈獨公朝之喜亦惟私閥之榮宜有寵光逮其考妣具官某故母某氏婦儀之善母道之嚴相其夫則閨門之內無違訓其子則朝廷之間有立發為賢業服在近司方收報上之忠宜慰顯親之志爰稽故事式舉彝章特紆綸綍之華追賁笄珈之貴尚其幽窆歆此新恩可

妻張氏可封和義郡夫人制

勅朕登用寶臣叅陪機政豈獨公朝之喜亦惟私室之

榮宜有寵光逮其伉儷具官某妻張氏賦資淑慎稟質
柔明既擢秀於閨房宜作嬪於君子獻可以替否曾弗
奪於家謀盡公不顧私豈無資於內助爰稽彝典用侈
新恩甫從一命之初遽錫小君之號往祇休渥嗣有褒
封可

朝奉郎吳表臣可除監察御史制

勅具官某文昌萬微所會而御史六察分紉列曹非學
足以知今古識足以明治體不在茲選以爾智術疏通

更練世務才猷之美趣操之端見推士論達于朕聽耳目之任爾實宜之自兵興以來事多從權取便一切典章墮紊蕩無綱紀繩治振肅要如平時庶幾艱難之中猶有朝廷之法往踐厥次毋違朕言可

朝奉郎知宣州李光治效顯著可除直龍圖閣
制

勅具官某朕注意良翰分憂近邦有社有民既著理平之績懋官懋賞可忘旌勸之規以爾早見吏能嘗持臺

憲識朝廷之德意習郡邑之民情蠲省煩苛自得人心之悅張明紀律亟觀郡政之修藹然治聲達于予聽進直龍圖之秘用增符竹之華朕方嘗膽思讐枕戈念亂期邦家之再造欲中外之同功顧敵騎乘秋慮密窺於淮甸而王師守險正嚴備於江津維彼宣城時為要地勉爾折衝之効副予倚重之懷尚有異恩以霑成績可

知蔡州程昌禹可除直龍圖閣制

勅具官某乃者敵騎長驅直抵江浙道路擁塞王命罕

通而淮西居中能為國守載省忠力朕甚嘉之進直龍
圖姑為爾寵尚堅守備以俟康平朕不汝忘嗣有褒陟
可

故奉議郎守監察御史張灝可贈直龍圖閣制
勅具官某比者遭敵內侵移師南渡永痛衣冠之禍可
忘忠烈之褒爾性稟端方氣充光大直躬不撓綽有憲
臣之風遇事敢言自得仁人之勇遽茲陷陣脅以從降
臨白挺而將殞其身罵兇徒而弗絕於口男兒死爾顧

苟活以何為生氣凜然想英靈之如在載嘉節誼深用
盡傷錫延閣之清姿慰忠魂於黃壤尚其冥漠識此旌
崇可

朝散大夫前尚書駕部員外郎孫端可復直龍

圖閣制

勅具官某龍圖閣初成章聖皇帝首命杜鎬待制禁中
繼召馮元更直閣下二人者咸以名儒與選天下高之
自是置員非其人不輕授也近時除授寔廣多以賞能

吏雖異故事猶為美稱爾頃將使指以勞得遷入補臺
郎坐事隨罷既更大需前職未還自言有司特以畀汝
夫身從吏事名寓西清亦云寵矣其思有以稱之可

朝奉大夫試御史中丞趙鼎可除吏部尚書制
勅周官冢宰任首六卿漢制尚書位參八座維職典銓
衡之要而班隣丞輔之崇在昔既然于今斯重久虛厥
次茲得其人具官某和裕而靖莊直方而敦大立朝正
色折衝允賴於精神遇事敢言發憤每披其肝膽赤墀

頻對白簡屢聞載嘉烏府之勞進陟鑿坡之峻抗章引
避陳義甚高察其操守之堅雖力辭於翰苑亮爾公忠
之素可輕去於朝廷其升常伯之聯往率天官之屬顧
干戈擾攘衣冠多失職之嗟而典籍散亡胥吏有用
權之患實藉通明之鑒克諧平允之稱往既乃心無忝
朕命可

欽定四庫全書

北海集卷三

宋 綦崇禮 撰

制

朝議大夫試禮部尚書曾楙可除顯謨閣學士

知洪州制

勅大江之西提封十郡而鍾陵為一都會素號繁雄屬
敵騎南侵遂遭蹂躪念戎車之退徒委空城而兵火之
餘未能安業肆擇循良之牧輒資侍從之賢具官某儒

學有聞行誼無玷更踐三朝之久越躋八座之崇嘗歷
藩宣每著聲績眷濟陰之郡政朕所深知且豫章之士
風汝其舊習更資豈弟往撫凋罷仍通學士之班以重
師垣之寄烟塵未息益修却敵之方郡邑新殘務致安
民之惠政成事定不汝久勞維吾邇臣當體茲意可

朝請郎張綱可除吏部員外郎朝請大夫王珩
可除戶部員外郎制

勅選部典領人材地官掌司邦賦維時郎屬俱號名曹

以爾綱儒學之優嘗魁多士以爾珩吏材之敏夙著能
名俾分庀於攸司以各從於其長惟清通可以處銓筦
惟強明可以濟劇煩往服官箴嗣有褒典可

朝散大夫行祠部員外郎成大亨可除戶部員

外郎制

勅具官某自艱難以來生齒凋殘民力困敝肆求忠厚
之士列屬地官庶幾施為知所寬卹以爾奮跡儒學久著
吏能端實而無他長老成而有勁氣為郎白首志節不

衰其易民曹往佐爾長體乎節用愛人之意以修厥官爾庸多矣尚勉之哉可

左朝奉大夫魏安行除尚書戶部員外郎制

朕克已裕民損之又損然國家經常之費欲罷不能非得學有經術幹彊而材者助成地官不足以洗有司出納之吝也以爾智慮精密機神敏明中外踐更風聲達于朕聽欽崎一斥輿誦閔焉起臨偏州最狀彰徹茲繇趣覲察之於論議之間郎於民曹非汝孰可往贊爾長

益殫厥心可

朝奉郎大理正王剛可除刑部員外郎制

勅具官某中臺郎屬外釐庶務皆天下之高選而刑憲之司生殺所係視諸曹為重異時選用必取通知法令之士庶幾讞疑平決罔失厥中以爾久任理官見謂明允肆從因任俾隸秋卿體予欽卹之仁毋失寬平之舉可故武功郎兼閤門宣贊舍人陳彥可贈武翼大夫忠州防禦使制

勅故具官某士有出於戎行而天資忠誼能以節死事
無愧搢紳者爾彥是也方其扼險以抗敵師兵力雖微
而迎拒不顧其志亦可嘉矣無何釁生部曲劫以為亂
毅然不從乃隕厥身覈實以聞良深嗟悼追加卹典遙
領戎防用旌爾忠尚知歆饗可

武功大夫忠州團練使邊順可特授依前武大
夫榮州防禦使制

勅乃者敵國內侵王師南渡維彼江津之險豈無屯戍

之功具官某親被使令能施方略指麾裨校分布要衝
卒控扼以無虞念忠勞之有績用稽國典加領戎防不
徒酬前日之勤抑亦勸將來之效益思奮勵期稱恩榮
可

右武大夫知鄭州董植可復康州防禦使制

勅具官某朕惟王者之法蓋如天道之無心有罪而加
刑以恩而肆宥惟適其當初靡容私爾材號驍雄性資
忠誼頃由遴選擢領要藩遇強敵之內侵嬰孤城而失

守力誠不足情在可矜責以後圖止從貶秩雖立功而論
賞官已再遷然引赦以滌瑕法當申敘進列橫班之貴
用疇邊寄之勤務蓋前愆佇觀來効可

武功郎閣門宣贊舍人閻臯可特與補吉州防
禦使所有借宣州觀察使候再立功日申朝廷
取旨施行制

勅將能勝敵既積日以戰多賞以勸功可久稽於國典
具官某奮由行陣克効忠勤頃提驍銳之師首復破殘

之郡奉朝廷而聽令總部曲以同心既擢領於兵權繼
往從於帥府外攘暴敵內禦叛徒凡轉戰之經時視殺
傷之過當載嘉勞勩宜在寵褒右武崇階遙防優秩爰
因所假俾即其真尚勉立其新功以嗣膺於後命可

右武大夫吉州團練使涇原路經略安撫使知
渭州曲端可除遙郡防禦使制

勅朕注意將臣分憂邊鎮建旃就道已諧謀帥之求出
綍疏恩申賁臨戎之寵具官某材空冀北氣稟山西謀

合孫吳進退中事機之會名追程李恩威得軍律之宜
自歷艱難荐膺任使衆許摧鋒之勇屢聞卻敵之功遂擁
高牙往臨方面爰進兵防之重式增閫寄之雄慨念疆
陲比多凋敝撫循里俗實資守土之良綏附羗夷宜講
和戎之利務農積粟蕃馬練兵共守衛於中原其削平
於外寇副予所望時乃之休可

武功大夫忠州刺史淮南西路提刑馬識遠可
除右武大夫知壽春府兼淮南西路安撫使

制

勅監司帥守為職不同然於恤民禦寇平亭獄訟經畧所部逆待不虞方時艱難其責任均也具官某學究韜鈴治游盤錯蚤由策武擢置掄魁更事任之既多出材能而自見其還使節往殿要藩進升橫列之榮以重中權之寄惟淮右當水陸奔衝之會而壽春承兵火傷殘之餘屏翰長江輔車近甸乃眷按臨之舊當知緩急之宜必內安閭里之居漸消姦宄而外謹關梁之備深戒

侵凌務足食而足兵俾且耕而且戰需爾報政寬予顧
憂可

知徐州趙立治郡忠勞顯著可特轉武德大夫
兼閤門宣贊舍人充管內安撫使制

勅具官某彭門當淮楚要衝之會承兵火傷殘之餘井
邑丘墟閭閻埃燼爾能收合離散保守城隍經畫有方
忠勞顯著載嘉乃績褒進厥官兼備贊之榮名領撫綏
之重寄益殫爾力以稱朕恩可

責授平海軍節度副使李稅可與復舊官除戶部尚書留建康府掌戶部錢斛官物及分劈錢物應副本府鎮江府太平州駐劄軍兵制

勅地官掌邦賦之繁最稱劇部常伯居從班之首實資輔臣稽考國朝之舊章叅用廟堂之故弼庶圖宿望以重厥官具官某器博而用周才高而識遠被道皇之眷遇已更踐於六卿膺淵聖之簡求亟延登於二府謀謨盡美功烈未終屬興禍於狄人或歸尤於使指繼從遷

謫久乃辯明召自遐陬對於行殿惜才猷之尚壯念風績之素聞其還省計之崇盡復文階之峻昔蕭何居國常足食於軍中而劉晏籠財不收民於賦外維持耆哲無愧古人方師徒留戍于江津念饋餉實資於心計勉濟中興之業豈忘舊德之勞往體朕懷奚煩多訓可

朝請郎新除中書舍人季陵可除徽猷閣待制

知臨安府制

勅乃者長江失守敵騎南凌爰及錢塘亦陷蹂躪念戎

馬之退徒委空城而兵火之餘尚多失業肆擇循良之
牧得予侍從之英具官某學貫聖言才周世務處米鹽
之密明既析於秋毫當盤錯之時刃亦游於餘地頃從
綸閣丐領真祠式資爾雅之文方復代言之任屬吳江
之謀帥輟禁掖以掄才僉曰汝宜勉為朕往仍還近職
以示寵章載念浙江重罹戎寇煙塵甫熄益脩禦敵之
方并邑新殘務致安民之應亟迴驛騎往慰吾人可

徽猷閣直學士通議大夫知慶陽府王似可差

知成都府制

勅自頃中州雲擾外寇日滋眷惟井絡之區獨保劔門之險肆求良牧以惠遠人具官某瞻智通方周才濟物垂紳鳴玉久聯侍從之班分閫析符屢典藩宣之寄頃更方面實莅慶陽羌戎綏服其風聲吏士畏安其教令念威邊乘塞雖資方叔之壯猷而化俗使民更藉文翁之善政其易夢刀之任勿辭叱馭之勤勉爾令圖寬予憂顧可

端明殿學士朝奉大夫同簽樞密院事周望可
除中大夫同知樞密院事制

勅入則總樞機之任以制勝於廟堂出則宣軍旅之威
以折衝于戎敵膺此艱難之託屬予魁壘之臣不有褒
隆曷昭眷倚具官某直方而不撓莊重而有謀將命出
疆數冒干戈之險奉辭伐罪克申鈇鉞之誅忠信弗渝
勲勞備著進舉本兵之務俾叅近輔之聯惟著意以方
深顧循名而未稱宜深位次以正官儀眷吳會之要津

扼敵人之要路王師在戍姑授印于軍中巨寇即平還
運籌于幄內安危所繫中外維均蓋既乃心無忘朕訓
可

朝散大夫充徽猷閣待制知鎮江府充兩浙西
路安撫使葉煥降授朝散郎制

勅膺師帥之託莫尚于循良制方面之雄尤先於鎮靜
苟辜委遇宜抵譴訶具官某夙有能名疑堪劇任為徒
帥藩之寄俾增州牧之權弗能慎重以濟功乃爾狂踈

而生事請不待報輒募兵於他邦用非其人幾召亂於
屬邑顧京口要衝之地正江津備禦之秋輕率若斯設
施何賴聊舉黜官之罰用懲失職之愆往訟前非尚圖
後効可

葉煥可落職提舉亳州明道宮制

勅西清次對之聯是為近侍京口撫綏之任實控要津
儻公議之靡容豈非才之宜處具官某術踈而果志淺
而狂嘗更踐於劇煩或推稱其風力遂膺選擇往備藩

宣進書殿之名越持從橐從帥垣之節增重守符期鎮
理之可能肆要求而拂拒顧未聞於治狀忽繼覽於彈
章宿負隱愆既犯士夫之清議輕謀妄作徒傳中外之
笑端初無憂國之誠何望折衝之効蓋獲利則懷自營
之計將脫身而為微罪之行原情信然明罰奚逭收還
禁職黜領真祠姑從邦憲之常薄示守官之戒益思厥
咎毋遂爾非可

神龍衛四廂都指揮使明州觀察使熙河蘭廓

路經略安撫使知熙州劉錫可除捧日天武四
廂都指揮使制

勅朕注意將臣分憂邊鎮建撫就道已諧謀帥之求出
綽疏恩申賁臨戎之寵具官某性資英毅智蘊深沈風
俗西山勇烈稱萬人之敵家聲塞外威名折千里之衝
自勵材猷荐膺任使入備周廬之衛出圖方面之勲踐
履既深勤勞滋久爰進軍權之次式增閭寄之雄慨念
疆陲比多凋敝撫循里俗實資守土之良綏附羌夷宜

金史卷之三
卷三
講和戎之利務農積粟蕃馬練兵共守衛于中原期削
平於外寇副予所望時乃之休可

朝散郎上官悟除秘閣修撰制

勅具官某朕以寇氛弗靖國步猶艱乃眷京都未還警
蹕實賴居留之寄寬予憂顧之勤以爾學有家風才堪
用世邦畿千里既倚重於皇華君門九重復兼勞於管
鑰載疇忠力豈吝寵光進陞論譔之華益近禁嚴之選
尚期勉勵嗣有褒遷可

朝請郎監察御史林之平可除右司員外制

勅具官某文昌萬微所會而都司分糾六聯維時官曹
最為要重非學足以知治體識足以達時變不在茲選
以爾奮繇儒術列屬憲臺庀事遠行克中機會載嘉才
諳宜有褒遷進疇爾能俾從宰士勉佐爾長以舉厥官
尚有寵章待爾成績可

徽猷閣學士通奉大夫盧法原可除戶部尚書

制

勅朕躬乘艱運志靖中原永惟戎旅之繁慮孰先於軍
食乃眷版曹之重職實總於邦財敷求其人俾共厥事
歷選列辟得吾舊臣具官某心計精明器資宏博才濟
劇煩而不露刃游盤錯而有餘典選天官士克稱於平
允守藩坤服人咸詠於中和久歎滯淹肆從收召其上
三年之最還居八座之崇慨念煙塵遠彌寓縣帑廩虛
而干戈未戢生靈困而征役不休足食足兵正方今之
急務知取知予思在昔之良規顧如汝能無愧前比往

欽朕命尚懋爾庸可

朝請郎吳安國可除考功員外郎制

勅具官某朕裁中都之員而臺郎為重推擇之慎顧豈異時比哉爾以經術甲賢科以材能使絕域進預握蘭之選嘗居考績之司出部郡符未諧士論其還故秩以續前功勿辭朱墨之勤用稔搢紳之譽可

起復中散大夫試戶部侍郎李迨可除顯謨閣待制江淮荆浙發運使制

勅朕惟狄難猶熾方嘗膽以思讎王師再行政張頤而待哺維時漕輓之寄必資強濟之才式圖近臣以庀厥事具官某吏能敏捷心計精明事朕軍中蓋有潛藩之助餽師海上肆升從橐之華既登貳於地官實委成于邦計屬敵兵之將退顧糧道之尚艱衆且思琦國方仰晏宜易西清之職往持大將之權維江湖淮浙之間因盜賊兵革之苦因功利而求寵固爾不為貪富強而勞民豈朕所欲其善經于調度以共濟于艱難尚既乃心

毋忘斯訓可

宣撫處置使司主管機宜文字張宗元可除工
部員外郎依舊張浚下主管機宜文字候回日
供職制

勅具官某朕以夷狄外逼寇賊內侵注意樞臣出宣威
令庶幾氛祲克就清夷爾輟自奉常往從軍務資其婉
畫經畧畿西獷悍革心咸思効順疇爾之績宜在寵嘉
擢位臺郎仍參機幕待終乃事還踐厥官益吐奇謀尚

有褒秩可

欽定四庫全書

欽定四庫全書

集部
北海集卷四至六

詳校官右中允臣薩敏

主事臣呂雲棟覆勘

謄錄監生臣嚴績曾

謄錄監生臣吳殿茨

欽定四庫全書

北海集卷四

宋 蔡崇禮 撰

制

中奉大夫直龍圖閣知温州盧知原治狀有聞
可持除右文殿脩撰制

勅具官某昔漢宣中興以為太守吏民之本數變易則
下不安故二千石有治理效輒以璽書勉厲增秩賜
爵用表章之人以競勸漢世良吏於斯為盛朕甚慕之

以爾剽劇有餘臨民不擾永嘉假守閱時即多藹然治
聲達於予聽俾陞華於書殿式增重於守符朕方久郡
將之權以圖厥績爾其先國家之急勿卹乃私益觀政
事之修庸副吏民之望固俾前美獨尊昔人可

樞密直學士通議大夫知渭州席貢可除徽猷

閣學士知遂寧府制

勅朕閱煩邊瑣均逸便藩眷于耆艾之臣宜厚寵光之
數具官某通材濟務宿望映時分閫析符屢易帥垣之

寄垂紳鳴玉歷更法從之聯惟久賴于折衝乃尚淹於
乘塞式加優禮少憩賢勞殿東蜀之名邦進西清之禁
職羽儀近侍既仗於老成師帥遠民更資於愷悌往敷
惠政庸稱朕懷可

從政郎充環慶路經畧安撫都總管司主管機
宜文字陸賁可改宣教郎再任制

勅具官某爾以閑閱如格應改京寮而銓曹之法當身
詣選顧慶陽帥幕方藉爾才特俾就遷仍留舊任勉佐

爾長圖稱異恩可

卷四

中散大夫行大理少卿王依可除大理正卿制
勅具官某廷尉天下之平職當守正大理人命所繫戒
在深文苟非其人可與茲選以爾處心忠恕用法詳明
久更踐於刑官屢決平於疑獄體欽恤哀矜之意得重
輕寬急之中進列正卿是為因任昔釋之居職時無冤
民日知理囚議無死法予欲勝殘而止殺爾其據正以
持平往率乃僚期繼前軌可

朝請郎趙子泰可除司封員外郎制

勅具官某天官郎屬最號名曹而主爵之司尤為清簡
非時望士不在選掄以爾好學有稱律身無過允為宗
支之秀久任州縣之勞省薦鶚之屢聞俾握蘭而就列
往底寵命益勵才猷可

朝散郎充徽猷閣待制提領水軍沿江措置制
使胡舜陟為前知廬州日因郡盜孫琦攻城守
禦有勞可特轉一官授朝請郎制

勅朕注意良翰分憂大邦有社有民既獲保安之効懋
官懋賞可忘旌勸之規乃眷勞臣宜加褒典具官某性
仁而勇氣俠而儒直節忠言聳憲臺之風采壯猷宏議
偉從橐之論思頃圖師帥之良嘗倚藩宣之重念彼淮
右鞠為盜區惠政治於一方親如父母威聲聞於四境
畏甚神明驅豺虎以遐奔奠金湯而自若載嘉往績申
進文階朕方疇其守土之功付以保江之責因能而任
堪事何疑惟爾慨然有為及此時哉勿失繼有殊寵佇

觀厥成可

朝奉郎直龍圖閣劉棐可除禮部員外郎制

勅具官某春官職典禮文之事而郎曹兼掌牋奏號南
宮舍人異時詞臣多此途出推擇之慎顧豈他官比哉
以爾問學該通文詞敏麗常叅聯於宰屬益明習於憲
章頃從外遷稍稽名用宜舉賜環之命俾歸列宿之司
維此小儀亦其已試屬亂離之未定將典故之是咨勉
行所知以俟褒擢可

朝散郎權都大同主管成都府等路茶馬趙開
可除直秘閣制

勅具官某自昔中秘之府豪英所羣寓直其間時謂高
選非顯有勤績不輕假人以爾幹局敏強性資忠厚遠
將使指克以才稱其從芸閣之游式重皇華之寄益思
竭盡嗣有寵褒可

朝請大夫提舉淮東茶鹽饒伯達可除直秘閣

制

勅具官某自防秋以來日虞寇暴監司郡守之吏望風輒去不得保其官守者多矣爾將命淮左實司煮海之利經營乃事獨如平時體國宣勞灼知忠蓋升華芸閣用酬爾勤益圖饒羨之方以佐軍須之急可

朝奉郎權知唐州趙尚之可除直秘閣制

勅具官某昔在李唐中葉盜起而嗣號王巨嗣曹王臯皆以宗室子守藩討賊立功當世書名史冊朕甚多之
以爾出自天枝長于吏治歷典劇邑咸有能聲假守泌

陽初無難色諭降叛衆之官與俱大臣以聞良用嘉歎
陞華內閣式獎忠勤勉建功名追繼昔人之美以副所
期可

奉直大夫知泰州王浚明可除直秘閣制

勅具官某乃者胡馬南侵塵暗江淞而海陵居中能自
保守士民安賴朕甚嘉之內閣華資儒林榮選肆以命
汝用勸厥勞益圖扞禦之方嗣有寵褒之典可

張鼎可除度支員外郎兼權戶部倉部員外郎

留建康府制

勅具官某朕躬巡江次留戍要津維時軍食調度之繁
宜資心計精明之士以爾踐更中外綽著材猷擢置郎
闈俾司計務非衆不可以守險非財不可以聚人欲師
徒之有功在供餉之無乏勉佐爾長往寬朕憂尚有寵
章待爾成績可

朝請大夫尚書都官貲外郎韓右可除金部員
外郎留建康府制

勅具官某中臺諸郎分釐曹務皆天下之高選時方用武財用是資則金穀之司為重爾比由才諳擢列秋官屬相府之臨戎欲舊寮之在世其易司珍之職留供軍戍之須往悉乃心以佐爾長功事成定朕不汝忘可

朝散大夫直秘閣蘇遲可除中書門下省檢正
諸房公事制

勅具官某朕於故家積習名教更練世務見謂老成曩陟郎闈嘗聯宰屬惟朝廷之事臺閣之儀其知之詳矣

宜還朝著往踐此官尚既乃心以佐而長可

中奉大夫新除右司員外郎張公濟可除中書
門下省檢正諸房公事制

勅具官某朕權時之宜合東西省叅稽舊制設檢正之
官以分釐細務任階給舍秩視都司而機事亦與聞焉
其選可謂重矣以爾智術疏通才資敏達踐揚中外綽
著風猷頃重列卿首將使指方名還於宰屬且更命於
是官其悉乃心以佐長吏綱條不紊而庶政以行予則

汝嘉欽哉毋忽可

沂州防禦使張宗賢可授崇信軍承宣使制

勅朕遭時艱難亟登俊乂思以禦災捍患彌盜息兵以爾克敵有功臨戎無懦既良勤於任事豈獨緩於酬庸嘉茲戎馬之勞晉以承宣之職往膺休命益勵遠猷可責授安遠軍節度使范致可復舊官除資政殿學士提舉中太一宮制

勅山有猛獸知藜藿之無傷國倚老臣視典刑而猶重

眷惟故弼久屈遐荒宜頒起廢之恩用示急親之舉具
官某才兼文武學貫古今望夙領於搢紳名素聞於夷
夏逢時被用雖一歲九遷而人靡間言去國遭讒蓋終
朝三褫而已無愠色更百為於夷險挺一節以周旋顧
國步之艱難正人情之危懼咨老成之智思獲壯猷訪
仁人之言冀聞長利召從嶺表入對省中嘉謀既沃於
朕心寵命可稽於朝聽其復文階之峻秩并還秘閣之
隆名假領真祠式優耆哲軍機未定正資借箸之謀國

事有疑更佇抵龜之決維我舊德豈煩訓辭可

端明殿學士朝奉大夫同簽書樞密院事周望

可除兩浙宣撫使制

勅自南渡以來亂靡有定敵不去境人情未安思得魁
壘之臣付以折衝之寄盡護諸將鎮茲要津我求其人
得於近輔具官某深沈而精敏敦大而高明行義足以
厲風俗之媮忠誠足以荷邦家之重居無擇事任不辭
難北使強鄰銜命冒兵交之險南平逋寇出師行天討

之誅載疇勲庸延置宥密攄發經綸之蘊備聞帷幄之
謀朕方移蹕南巡留屯近戍其即樞機之任往宣鈇鉞
之威維患必豫防正循江而嚴備顧兵難預度煩總衆
以親臨佇聞綏靖之期還倚贊襄之助體予注意勉爾
成功可

劉文舜可特授左武大夫遙郡團練使制

勅朕比遣大臣追捕逆徒巨猾成擒已從梟戮餘妖假
息猶肆跳梁具官某誼激報君志存疾惡全師掩擊殘

黨盡殲載省忠勤良深嘉歎進階橫列兼領戎團併錫
茂恩用昭殊賞益思奮勵尚有寵褒可

神龍衛四廂都指揮使降授明州觀察使閻丘
勅可復保寧軍承宣使制

勅罰以示懲蓋本至公之義赦當除罪用推更始之仁
具官某材稟驍雄性資沈毅奮由行陣展為筋力之能
總此師徒任我爪牙之寄失于戢下坐以敗官既獲宥
於寵恩俾還陞於故秩惟勤勞可以補過惟忠誼可以

報君往服予言益圖乃績可

朝奉郎中書門下省檢正諸房公事傅崧卿可

除直龍圖閣知越州制

勅具官某乃者長江失守敵騎南侵爰及會稽并臨烽
火念戎車之退徒委空城而兵火之餘尚多失業肆求
良牧往撫疲民以爾富有藝文通知世務輟自機衡之
地往從金革之勞扞牧圉以臨戎既心存於王室即鄉
邦而為政庶身習於民情其陞延閣之華以侈繡衣之

龍煙塵雨熄益脩禦敵之宜郡邑新殘務致安民之惠
勉赴功名之會永為閭里之榮可

檢校少保光山軍節度使同知大宗正事士儂
可除知大宗正事制

勅朕以釁結外夷痛兩宮之遠狩兵纏中夏憫九族之
散遷肆擇宗英俾司屬籍庶賴糾綏之力克隆惇敘之
思具官某率禮無違好賢有譽寵先近屬蓋惟道德之
親位在元戎允謂詩書之帥歷更事任備著材猷宜典

領于宗盟以保寧于公族朕方馳驅戎馬力圖家國之
安爾其收合天枝用固本根之庇益祇厥職以副所期
可

高衛可除顯謨閣待制知虔州制

勅大江之西虔為劇郡平時獄市已稱夥繁矧胡馬南
侵而豫章不守宮闈官府遷寓是邦必資宿望之臣俾
任分憂之責具官某蚤更器使久著能聲疏通之才多
所練達深厚之量見謂老成頃擢貳於天官俾分曹於

行省適茲擇守僉曰汝賢爰更次對之班就畀藩宣之
寄軍民未靖其鎮撫於營屯兵革甫寧尚保安于宮掖
政成事定朕不汝忘可

欽定四庫全書

北海集卷五

宋 綦崇禮 撰

制

朝奉大夫直龍圖閣知福州林安上可落職與

宮觀制

勅具官某人臣事上當慎於私交君子持身尤嚴於內
行爾久更事任蚤勵材猷夫何操履之間未免士大夫
之責薄於伉儷傷閨門雍睦之恩厚彼苞苴結將帥勤

渠之意師徒既遠饋遺何名至於有士卒而不知撫循
之方任蕃宣而不知鎮靖之術惟居家而弗理宜治郡
以無聞茲繼覽於彈章省嘗興於訟牒優容至此觀聽
謂何念其經侍於軒墀姑俾上還於符竹并罷龍圖之
直往從祠館之遊尚識寬恩益思前過可

朝散大夫充徽猷閣待制季陵可落職依舊宮
觀制

勅朕操子奪以馭臣明賞刑以勵世行之以公義處之

以無心苟自致於人言固難逃於邦憲具官某頃當明
受實掌贊書屬逆黨之嘯凶懼外臣之赴難謀奪之兵
而不可欲加之罪其無辭爾遠代言乃顛順指肆為誣
詆曾靡嫌疑朕方資耳目於言官委心腹於樞輔覽抨
彈之繼上酌好惡之甚明其收從橐之華尚假真祠之
逸往加惕勵毋重悔尤可

資政殿學士朝請大夫權知三省樞密院事滕
康可落職提舉亳州明道宮資政殿學士朝散

大夫權同知三省樞密院事劉珣可落職提舉
江州太平觀制

勅朕以邊塵未靖江戌方嚴式圖近輔之臣往總行臺
之務即豫章之便郡奉長樂之安居分釐政事之常期
固邦家之本苟辜委遇曷追譴訶具官某等各以特名
揚於禁路偶承人之進視柄司俾陪侍從之行冀副
難之託既同責任固克寅恭或狠愎而無遠謀或煩碎
而失大體兩執所短交詆其非弗思備禦之圖旋致奔

逃之禍敵兵既逼軍伍皆離慈闈寧免於驚惶宮掖半
遭於刦辱衣冠頓仆黎庶傷殘謀實爾乖咎將誰執覽
彼臺臣之奏勞予盱食之憂其鑄秘殿之華資尚假真
祠之優祿往加循省毋重悔尤可

中大夫直秘閣韓思永可落職與宮觀制

勅具官某臣無擇事義可辭難邦有常刑罪當苟免爾
頃違北闕出守南陽欲借重於軍權俾還兼於帥節謂
朝授命當夕引途何宿留以踰年尚遷延於他郡妄言

就職弗省厥官規欲脫身善交乃事任人若此誤國何
疑褫內閣之清資蒞真祠之散局猶寬爾罰宜識朕恩
可

殿前都指揮使昭化軍節度使郭仲荀可責授
汝州團練副使廣州安置制

勅自干戈外侮寇攘日深皆緣將帥之臣莫適任患雖
有國家之法曾不加誅至因循成姑息之風肆偃蹇蓄
自安之志欲嚴師律宜正邦刑具官某蚤踐戎行嘗更

邊寄久典周廬之衛遂分齋鉞之雄謂其被寵以知恩
庶克臨危而効死屬江津之失守當荆部之戒嚴考彼
師言汝為宿將俾副宣威之任冀收御敵之功賊已侵
杭兵宜備越懷私顧望智豈迷於利昏聞敵倉黃膽真
慚於身大規作奔逃之計漫陳分戍之宜未聞朝命而
遽行多取軍須而妄費既移師而遠遁乃委衆以先馳
居民驚擾於閭閻部曲散離於山谷逮還經於行在輒
潛過於輕舟隳軍而長寇讎既負畔官之責委質而為

臣子敢乖事上之恭覽近臣之抗言用中司而即訊靡
知引咎猶欲飾非此而弗懲孰不可忍尚念勤勞之舊
時寬典憲之常黜以散員投之遠服往體涵容之德毋
忘惕勵之誠可

朝奉郎提舉亳州明道宮邵薄可責授汝州團
練副使峽州安置制

勅具官某仲尼上聖也君命名則不俟而行朽者賤工
也而其為言曰食焉不怠其事夫聖與庸亦遠矣然義

之所在不相為謀而有合焉爾儒服衣冠世有名節久
習朝廷之事嘗為侍從之臣稔行治之有聞宜險夷之
不易而乃避匿君命務從便安耗蠹公錢坐糜供饋忘
聖人之大訓為賤工之所羞豈爾之賢而安處此至於
干撓府政妄騰事端則又非所望於爾者嗚呼靖康建
炎之際爾則未免于累矣乃憚從朕於艱難是誠何心
哉度爾之私其以親故覽近臣之劾狀益有惻於朕懷
姑易散員遷之遠郡體茲寬憲毋重悔尤可

邢儻責授汝州團練副使英州安置制

九月十六日三省樞密院同奉聖旨靖康之春金人既退正國家堅明信誓以靖多難而邢儻小生首倡結伊都之議李綱和之遂令敵國有辭再致凌犯迫遷二聖塗炭萬民職此厲階至今為梗則生事敗國義不容誅而乃雄據要藩尚臨民社雖儻之顏面無恥而國之典刑當正可責授汝州團練副使英州安置仍令荆湖北路提刑司差人押赴貶所

勅具官某乃者靖康之難戎騎既旋盍思守約以靖民
何至徼功而生事維時愚相信爾狂生弗量用間之難
徒負敗盟之曲結其貴將為此厲階肆敵國之有辭乘
中原之無備薦興軍旅再犯京師致兩宮勤沙漠之行
使萬民罹塗炭之苦噬臍靡及流涕何追顧當時主議
之臣既從遠斥獨先事首謀之罪未抵嚴誅猶竊任於
藩宣乃安臨於民社爾則無恥國當有刑其更散秩之
員往即遐荒之竄尚知寬宥無重悔尤可

降授通議大夫充顯謨閣待制知袁州王仲薏
可先次落職放罷制

勅昔天寶之亂河北諸郡悉陷獨常山平原能為國守
則以杲卿真卿二顏在焉功雖不遂而堂堂忠烈之姿
相望一時可謂不辱其門而無負於國矣以爾具官某
出自相閥宜知義方久塵侍從之班未聞報効尚緣家
世每與使令為郡江西與其弟並屬秋師之南寇顧城
守之弗圖力誠不支死猶有說乃敢顯虧臣節頽其家

聲臨川既降宜春繼屈魯衛之政若循一途偷生之計
則然教忠之訓安在汝雖不慚於顏氏兄弟亦何施面
目見汝先人於地下乎其解郡章并收從橐往需後命
以省前非可

奉直大夫充集英殿修撰知洪州王子猷可先
次落職放罷制

勅具官某朝廷置守以典一州命帥以臨一路固欲任
民社之託遏寇攘之侵儻乖所期奚遠明憲爾頃由宿

望分牧江西庶資禦敵之方可冀折衝之効而有城弗
守聞寇遽奔捐井邑於豺狼陷生靈於塗炭力雖不足
責欲誰歸乃引咎於抗章方原情而議罪其上帥藩之
符節仍鐫禁殿之班資往訟前愆以需後命可

中奉大夫集英殿修撰沿江制置副使王義升
可先次落職放罷制

勅具官某爾頃嘗條上防秋之策若可施行論者固以
爾為疑矣朕不欲以人廢言故置羣議而付之以其事

乃自去冬以來寂無奏報而寇得濟江而南者則爾所部也噫使經畫幾察有以先之如爾之言能至是乎用人之失果敗吾事其鑄禁職乃罷厥官往省爾愆以俟後命可

內侍黎崇可特降五官授武顯大夫歸吏部制勅具官某先王之時大小之臣咸懷忠良雖侍御僕從罔匪正人未聞左右近習而慢令營私者也爾結髮入侍給事禁庭罔知恪恭以聽上命而意所自便不即遵

承此而可容何以示戒黜官五等歸就吏銓服我寬恩
往思而過可

吏部侍郎兼權戶部侍郎高衛可降一官制

勅朕以中原用武江津戒嚴肆命大臣奉迎長樂宮處
於幽隱之地分遣百執從衛而南雖是供億之繁蓋資
四路之計各有區處固亦裕然而不乏矣其官某久稔
搢紳之言謂更金穀之用方典選部俾兼地官曾經畫
之未聞遂開陳而有請爾猶若此予何賴焉尚寬失職

之卓薄示黜官之罰往圖來効以盖前非可

親衛大夫榮州防禦使巨師古可降三官制

勅李廣臨衆簡易而士樂為之死程不識治軍嚴苛而虜不得犯或寬或猛之不同而二人皆為名將往迹具存唯所以用之如何耳以爾具官某嘗征畔徒克隆其衆居爾部曲亦既踰年軍政人情宜相諳習豈統馭之無術將撫循之少恩奸心復萌重致奔逸維時主將責可逃乎尚念前勞特寬嚴憲黜官三等用示薄懲體我

明恩往圖後効可

承奉郎直龍圖閣添差權發遣副使劉寧止朝
散郎權發遣江東轉運副使李尚行可各降一

官制

勅具官某等朕以中原用武江津嚴備乃命大臣奉迎
長樂宮處於深隱之地爾等各以使指往護其行而率
職不度曾弗戒備風濤之恐舟楫幾危雖神龍陰相尋
於安濟而從行兵民盖有不免於沒溺者矣臺臣言狀

良駭予聞貶秩一等用懲失職體茲寬宥毋怠省循可
權知鄜州張孝思可降兩官制

勅王者之法賞罰欲均而不可偏廢自艱難以來旌勤
忠誼之士褒揚死節推祿戰多未嘗取緩如其棄城失
守避事苟生而刑不加焉何以示法具官某頃繇材力
進膺邊寄官升橫列兼領戎防國家於汝厚矣謂當効
死以報至恩日者敵騎深入大帥以汝為能檄守洛郊
制其衝要而乃怯於當敵委郡先奔守土若斯國將何

賴黜官二等尚寬爾刑益訟前愆永為後戒可

徽猷閣直學士朝請郎陳彥文可先次落職制

勅端木賜孔門高弟而貨殖韓安國漢朝名臣而資貪
如彼昔人之賢未免後世之議矧非其匹可有是疵具
官某早陟近班久更煩使屬此難虞之際起於擯廢之
中圖有一日之長付以九江之責驅攘盜賊實宣扞禦
之勞撫養罷羸顧乏廉平之譽培取無藝侵漁一空既
徒厥官盡去其籍會樞臣之出使按罪迹以上聞方劾

實於臺僚難厠名於從橐其鑄禁職往對獄辭尚省爾
愆無尤邦憲可

朝奉大夫權荆湖北路轉運判官劉岑可降兩
官差唐州監酒通直郎直秘閣知鄂州成無玷
降三官依舊知鄂州制

勅具官某等朕委重樞臣宣威諸道監司州牧之吏節
制所臨是宜遵聽約束各循分守協力一心共濟艱難
而爾二人乃方交惡輒因白事遂至紛拏後公家之急

而校彼私讎忘心競之忠而爭其口語慢朝廷之威命
忽廉陛之等衰平居猶然緩急何賴宜從貶秩用儆在
官維爾岑舉措素輕失奉使體其黜臨筦推之卑爾無
玷設施粗見有治郡稱姑責以撫寧之効往祇子訓各
省爾愆茲猶不懲刑當無赦可

承奉郎趙良翰可特與換忠訓郎制

勅具官某爾挾占卜之技遊公卿之門黃綠受知假託
入仕謂當益匿稍自矜持乃因擾攘之時輒露姦污之

跡既傷風教實玷播紳顧難冒於文階俾更從於武選
往安爾分其草乃心可

奉國軍奏忠翊鳴鶴巡檢陳中母郭氏年九十
二可特封孺人制

勅具官某母郭氏王者貴老為其近於親也自兩宮北
狩違慈顏溫清之奉朝夕思望不勝陟屺之情而中乃
有母壽將百齡就養在官舉如其制朕甚榮之屬以郊
恩錫茲嘉號用為汝寵以介壽祺可

朝散郎楊萬里轉朝請郎制

淳熙十三年五月二十六日

勅朝散郎樞密院檢詳諸房文字兼太子侍讀賜緋魚袋楊萬里朕妙簡耆儒列之儲禁若經若史敷繹發揮必期有補於聞見固不徒做古具文而已唐臣諫篇茲焉徹卷疇庸顧可後諸爾以淵源正大之學再召為郎茲列屬於樞廷仍叅華於宮窠凡誦說講劇之次皆箴規篤實之言直諒不阿忠嘉可尚一官之賞未足以酬卿也惟贄忱誠勁節論切事情道本仁義數十百篇之

旨爾固知之熟矣茲欲見於舉行尚毋嫌於條奏可特

授朝請郎

案揚萬里不應與崇禮同時况崇禮登重和元

年上舍第至淳熙十三年相隔六十餘載史稱崇禮年六十卒不應此時尚存其為後人誤入無疑今姑從原本附錄於後

欽定四庫全書

北海集卷六

宋 綦崇禮 撰

制

除劉光世特授開府儀同三司集慶軍節度使
依前充兩浙西路安撫大使馬步軍都總管兼
知鎮江軍府事兼管內勸農使加食邑食實封
制

門下更六纛以臨軍茲表元戎之績擬三台而建府益

隆上將之權朕遭履艱危懷思英傑禦侵戡亂既彰勝
獲之功飲至策勲可後褒崇之典誕揚大號敷告羣工
太尉奉國軍節度使充兩浙西路安撫大使馬步軍都
總管兼知鎮江軍府事兼管內勸農使彭城郡開國公
食邑三千三百戶食實封一千三百戶劉光世識洞韜
鈴躬持禮法稟山西之勁氣常賈勇於三軍傳閩外之
威名自折衝於千里蚤由世將久服戎行盪寇出師從
北討南征之役勤王入衛有左扶右掖之勞負功名而

每懷謙退之誠居富貴而曾靡驕矜之色風移介冑譽
在搢紳授鉞齋壇克嗣建旄之舊差肩政路遂兼長武
之雄曩屬防秋俾從分戍提行營之印往屯淮甸之衝
遏南牧之師旋易湓城之鎮隱然巨屏屹若長城馬既
飲江賊逢避境雖寇鋒莫禦俘醜類以良多顧鼠輩何
為掃妖氛而畧盡奉介圭而入覲喜文陛之重登語及
艱難志猶慷慨念作藩於京口方新大帥之名肆換節
於譙都超視上公之秩併加異數用答殊勲人望所同

師言其穆於戲為將為相斯貴極於人臣憂國憂家諒
心存於王室朕則無負於忠勲之報爾其勿忘於禍亂
之圖捐爾之私則爾亦成其私先吾之利則爾亦成其
利尚念股肱之同體益堅金石之一心期共剪於寇讎
克再安於宗社往服茲訓佇觀厥成可特授開府儀同
三司集慶軍節度使依前充兩浙西路安撫大使馬步
軍都總管兼知鎮江軍府事兼管內勸農使加食邑五
百戶食實封三百戶主者施行

除劉光世特起復寧武軍節度使開府儀同三司依前充兩浙西路安撫大使馬步軍都總管兼知鎮江軍府事淮南東路宣撫使兼營田使食邑食實封如故制

門下忠之所移者孝顧孰先父子之恩禮之有變者權蓋宜徇國家之急嗟予良翰宅彼大憂雖苴麻之慕方深然金革之虞可奪式頒明命敷告治朝持服前寧武軍節度使開府儀同三司充兩浙西路安撫大使馬步

軍都總管兼知鎮江軍府事淮南東路宣撫使兼營田使彭城郡開國公食邑四千三百戶食實封一千八百戶劉光世智勇無前恭勤不懈南征北討名夙播於華夷入衛出藩任兼隆於將相自鎮臨於京口且綏定於淮孺休士卒以屯田方講營平之策拊流亡而復業寢觀渤海之功威望既彰敵情原屈正賴折衝之効遽興陟岵之悲維乃先臣為時宿將聯勲盟府得教子之義方從乃穹廬卒隕身於名節念爾家讎之未雪屬茲戎

事之猶繁義不戴天應厲枕戈之志忠當許國難從釋
位之規即命袞之上儀仍齋壇之舊節其還所治用訖
爾庸於戲喪以禮成固欲盡三年之愛恩由義斷亦奚
拘貳事之嫌期兩報於君親盍並圖於家國尚抑茹荼
之痛毋忘嘗膽之思可特起復寧武軍節度使開府儀
同三司依前充兩浙西路安撫大使馬步軍都總管兼
知鎮江軍府事淮南東路宣撫使兼營田使食邑食實
封如故王者施行

除劉光世特授寧武寧國軍節度使依前起復
開府儀同三司充兩浙西路安撫大使馬步軍
都總管兼知鎮江軍府事淮南東路宣撫使兼
營田使加食邑食實封制

門下越十連而置帥所以尊大夫之權兼兩鎮以秉旄
所以重元戎之寄維時屏翰夙倚勲賢撫歲序以再遷
眷勤勞之備至肆揚褒冊用詔庶工起復寧武軍節度
使開府儀同三司充兩浙西路安撫大使馬步軍都總

管兼知鎮江軍府事淮南東路宣撫使兼營田使彭城
郡開國公食邑四千三百戶食實封一千八百戶劉光
世胄出山西書傳圯上謙虛好禮居多賢士之風慷慨
赴功真是將家之種從戎二紀宣力四方昨上印於行
營俾出藩於京口長城可托實南蔽於吳江故地稍還
遂北收於淮楚數摧巨敵屢奏膚功折馘取俘寔息烽
烟之禍披堅執銳每先裨校之勞雖推功徧迨于師徒
而議賞未加於主帥載惟爾績有慊于心顧品秩既崇

久列三槐之次而儀章增大式頒雙節之雄不移寧武之舊邦更莅宣城之名鎮進陪采賦仍衍真封以示寵光以昭眷遇於戲將者國之輔蓋方圖王室之中興鉞為將之威亦何愛齋壇之疊投念邊塵之有警且敵境之與隣其謹備于不虞以毋忘於遠畧尚堅素志勿替前功可特授寧武寧國軍節度使依前起復開府儀同三司充兩浙西路安撫大使馬步軍都總管兼知鎮江軍府事淮南東路宣撫使兼管田使加食邑五百戶食

實封三百戶封如故王者施行

除劉光世特授檢校太傅依前起復寧武寧國
軍節度使開府儀同三司充江南東路宣撫使
建康府置司加食邑食實封如故制

門下朕觀高帝創興王之業亦安能久居于漢中孝文
懷良將之風則未嘗不在于鉅鹿眷吾當世之傑克繼

一作著

昔人之賢旄袞交輝俾東西而作鎮鼓旗相應庶

表裏以濟功載涓休辰敷告列位起復寧武寧國軍節

度使開府儀同三司充兩浙西路安撫大使馬步軍都
總管兼知鎮江軍府事兼管內勸農使彭城郡開國公
食邑四千八百戶食實封二千一百戶劉光世威嚴而
持重沉毅而尚謀勇冠軍中幼已從於父戰名聞閭外
壯自取於侯封屢宣入衛之勞茂著勤王之績迨作藩
於京口實扞寇於淮瀆吳漢在軍隱若敵國李勣護塞
賢於長城盡經理之百為見忠純之一節幸天心之悔
禍屬敵境之按兵敢恃小康遽忘遠畧臨泗濱而列戍

良所重煩撫江左以宣威武從改命益資雅望還控上
游視黃閣以叅華仍墨練而從事申加采食昭示邦彛
廉藺相歡應體公家之急賈馮不伐佇觀遠業之成於
戲彈廩廩之儲以養兵斯欲賴一朝之用枉名器之寵
而命帥豈其美百姓之觀維予一人注意以疇咨與彼
萬方勞心而屬望爾之責也徃其欽哉可特授檢校太
傅依前起復寧武寧國軍節度使開府儀同三司充江
南東路宣撫使建康府置司加食邑五百戶實封三百

戶如故主者施行

除劉光世特起復檢校太傅寧武寧國軍節度
使開府儀同三司充江南東路宣撫使彭城郡
開國公食邑五千三百戶食實封二千四百戶
依舊建康府置司制

門下禮居喪則不從政雖曲本於人情將受命而忘其
家蓋當先於國事眷予賢帥實總師徒方更鎮於上游
乃重遭於大故肆頒申命以詔在廷持服前起復檢校

太傅寧武寧國軍節度使開府儀同三司充江南東路
宣撫使建康府置司彭城郡開國公食邑五千三百戶
食實封二千四百戶劉光世智及勇俱忠兼孝立周旋
出入身久在於兵間契濶難心每存於親側蚤從父
戰晚與母逢由跳盪之功遂顯名於當代盡劬勞之報
獲就養於高堂理實難謀天胡不弔既抱靡瞻之痛復
纏何恃之悲載惟將相之大臣無取閭閻之細行宣威
南國正需方名之勲終服倚廬可狗騫參之志矧綠金

草已釋苴麻顧注意以彌深荐奪哀而奚避起從苦出
還昇旌旄被以衮衣視鼎司而建府命之黻冕假帝傅
以臨屯壘示新恩悉仍舊貫以慰三軍之望以寬丙夜
之憂於戲事有貴於從宜恩豈顯於檢義見杯圈而輟
飲固孝子之至情墨線經以臨戎亦昔人之變禮勉服
予訓毋留乃行可特授起復檢校太傅寧武寧國軍節
度使開府儀同三司充江南東路宣撫使彭城郡開國
公食邑五千三百戶食實封二千四百戶依舊建康府

置司主者施行

除范宗尹特授通議大夫守尚書右僕射同中
書門下平章事進封高平郡開國侯加食邑食
實封制

門下論一相而弼一人斯舉有邦之職典百寮以擇百
揆必求名世之才朕遭時險艱注意賢雋庶獲中興之
佐共圖復古之功我得其人肆頒明命中大夫參知政
事高平縣開國男食邑四百戶賜紫金魚袋范宗尹端

凝而和裕沉厚而高明學深造於本原識該通於遠大
布衣論事馬周若素官於朝白簡持平元衡負真宰之
器擢陪丞輔備罄謀謨勤小物而務振於頽綱斷大事
而靡聞於遺策屬虛魁柄實總政機詢用羣言獨取梓
人之効講明故事遠追漢相之規顧考慎之已詳察忠
純之可屬其延登於揆路俾寅亮於天工併陟文階進
分侯社倍增采賦昭示寵光慨念我家奠高前古久戰
干戈之用遽生疆場之憂胡馬長驅但肆侵凌之計乘

輿遠播未知旋復之期王師益媮而無決勝之兵軍食
寢難而乏相因之粟念茲國步危若綴旒非望可折衝
則何以鎮服於四夷非力能起廢則何以彌綸於百度
緊汝秉鈞之責寬予當饋之嗟斷以不疑任之勿貳於
戲興哀撥亂朕敢忘王業之難持危扶傾爾其任天下
之重尚賴同心之助克伸嘗膽之誠往究遠圖奚勞多
訓可特授通議大夫守尚書右僕射同中書門下平章
事進封高平郡開國侯食邑一千戶食實封四百戶主

者施行

除吳玠特授檢校少師奉寧保靜軍節度使依
前川陝宣撫副使進封建安郡開國侯加食邑
食實封制

門下朕躬臨江表慮在坤維陸海神臯既失秦川之利
銅梁劍閣敢言蜀道之難屬予屏翰之良搃彼關山之
險連摧巨敵繼上殊勳將大聳於師瞻用顯盼於廷號
檢校少保定國軍節度使川陝宣撫副使建安郡開國

侯食邑一千五百戶食實封六百戶吳玠沉雄而先計
壯決而尚謀結髮戎行勇氣夙聞於絕塞建牙方面威
名自折於遐衝頃典護軍嘗資扞敵據其勝地初營原
上之屯克彼全師悉殄目中之寇能保四川之固盡憑
一戰之威何忿戾之罔悛尚窺覷而未已維此殺金之
役實當全蜀之蹊豫料敵情逆為戰備交鋒百鬪嘗以
逸而待勞擣壘四攻乃用寡而覆衆首渠各遁黨類幾
殲載嘉三捷之聞獨賴一軍之重方趣第戰多之賞肆

稍稽國典之行制在中權顧孰先於主帥位升左棘俾
首視於孤卿加兩鎮之節旄盛元戎之儀物肇開公社
并行主腴以侈大於俊功以昭明於褒律於戲懋賢賢
之道名遂亞於師臣恢將將之模任亦兼於連帥往欽
服命思廣爾庸斯西鄙之載寧覬中原之可定繫乃忠
力豈煩訓言可特授檢校少師奉寧保靜軍節度使依
前川陝宣撫副使進封安定郡開國侯加食邑五百戶
食實封二百戶主者施行

除邢煥特授慶遠軍節度使充醴泉觀使特封
德清縣開國子食邑五百戶食實封二百戶制

門下親帝祠而行慶本朝存不易之規以后父而疏封
歷世有相承之制朕禮神而徼福稽古而廣恩維時威
里之良來被合宮之澤肆頒齋鉞式布明綸保靜軍承
宣使邢煥稟德純明賦資樂易納嬪朱邸蚤聯肺腑之
親正位長秋遂托椒房之重方履艱難之際實宣陪扈
之勞恂恂敦謹厚之風翼翼執謙恭之節蓬英遊於延

閣嘗綴從班承密旨於中樞旋更使領求閑甚力避寵
弗居乃遠引于荒遐殆備嘗於險阻比賜環而錫命喜
乘驛以來歸顧宮掖淒涼重感播遷之禍而姻親零落
孰寬寡恃之憂留寘行朝復辭要地念恩均百辟可獨
限於后家矧官滯五期盍序陞於將閫是用建節旄於
南屏奉祠館於中都多食圭腴肇開封邑茂舉邦朝之
典并為賢戚之榮於戲家重身尊曾靡嬰於吏職仁霑
恩洽茲共享於神休惟富貴不離其躬則君臣並受其

福往膺渙渥益勉令名特授慶遠軍節度使充醴泉觀
使特封德清縣開國子食邑五百戶食實封二百戶主
者施行



